

آذربایجانین مدرک شاعری کریم آقامشروطهچی «سؤنمز» ین ۷۵
ایل لیگی بهانهسی ایله ۲۰ ایل لیک مریدانه دوستلوق خاطرهسی.
اصغر فردی

دنیزلر ده قیش دا بؤیله اوشور ...

اوزون زمان دی گونش سیز گؤیون قوجاغیندان
پریده رنگ ایله پاییز پرده - پرده اثر
قارالتی قوینونا قاپ - قاره قان قوصاندا افق
پری لرین پوزولان آشیانی جلوه له نر
گؤیون گوزونده گوزل بیر ایشیلتی گورسن سه
گیرر بولودلارین آلتیندا گیزله نر و سؤنر
بودور!

بو!

تالواسالی طالعین گورونتولری

بهار طراوت لالی ایله، بوش خیالی ایله
چیچک لری آچیلارکن، یومار دوداق لارینی
سویود اسیر ایکن، آزاده لیک دن ائیلر اوئود
قلم اولوب قولو، قولتوقلایب بوداق لارینی
گونش اوئونده یانیر صانکی گول صاباح اوتانیر
جدام خسته سی تک گیزله بیر یاناق لارینی
بهار، یوز ایل اولار کیم طراوتین ایتیریب

اونون ياديندا قالان: بير آووج صاريمتيل باغ

اونون يادين دا قالان: قان

قادا

قيروو

قيش دير

چيچك لرين پايي تقدير دن تپيک لر ايکن

خزان تالانينا ليکن چيچک دير،

آلقيش دير

اونون يادين دا نه بير شعر وار

نه بير ماهني

اونون يادين دا قالان غارت ايله قارغيش دير

اونون يادين دا آخان قان

چوروين انسان وار

اونون يادين دا نه بير بزمگاه نوشانوش

نه قاينايان بولاغين دا قيزيل باليق اوينار

بو باغي هپ چئويريب دير قانار - يانار داغلار

ساوالانين کؤزونه «شاييل» ين گؤزو قاينار

اونون درين دي غمي

نيسگيلي

ياراسي

درين

درين يارادا قيزيل گول کيمي قانار

و

قانار

گۆيون ده باغرى شراب شفق سوزر،

آغلار

ملاله باخ!

ياشار اشرارى يادلارين يوز ايل

منيم ده ديغلار

اؤلر

شاه بابام اوتوز ياش دا

منيم قارانقوشوم ايتسين آياق لار آلتين دا

اونون سا سارى اوتورسون يوخارى دا

باش دا

پاييزلا ميش باغيم!

آغلاش بولاق لارين لا

ياواش

قوى آغلاسين بو الم له آغاج دا

صال داش دا

داريخما! دان دا دوغاجاق،

آغاراجاق قاش دا

او گون كى «داش قاپىلى» باغ دا قالمش ايدىق اسير
 آخىردى قيرقى گوزون دن «خان» ين قيزيل قان ياش

صويا گندن ده اولوردو شهيد قيرخ گونه دک
 «دگئیدی اوخ بو گوزوم دن دئدی حسین ای کاش»
 صونون دا قارتالی آل قان صوواردی غربت ده
 سلاحین آلدی، اوزون ائيله دی اسیر اوباش
 وئریلدی بؤيله اونون اجر و مزد ایثاری

مین ایل لر ایله مئشه ییگک لیک ائتدیگ اورمان دا
 صونون دا یاد پاییمی قویدو اووجوما بئله جه
 تیکیب الیم له فیدانی فیدانا باغ صالديم
 اوزون قصیده یاراتدیم اوزوم هجه به هجه
 هجایا قاحدی،

رجزخوان اولوب قارا قارغا
 بو خوش نشیده می دؤندر دی گؤر هجایا نجه
 شعر دیلیم توتولوب
 اولدو گوندوزوم ده گئجه

بو باغین اوغلانی «ساهر» کیمی قییار جانینا
 یازاری «رفعت» اولار قبرینی قازار -
 اؤلر

باغین پاییزدا اؤتن خاری بولبولو
 حیفا!

یاتار قفس ده

و

هشتاد یاشین دا خوار اؤلر

فسوس!

الهه تارى سى، «بيگجه خانى» سى

خراب آغلايار

اينلر

يانار

خمار اولر

ترنمى يارالى،

نغمه سى حزين

پوزغون

باغين قلم چالان اوغلون دان ائيله ييم دستان

شكست و حسرته مانوس،

درده آلفته

اوياق كن اوستونه ياغماق دا رشك سونگولرى

اوزون - صويوق گنجه لرده يوخوسو آشفته

ديلى اوچوق لو بيرر نغمه كار بولبول دور

بلالى شاعر،

اوندان نه بسته

نه گفته

سازى صينيق،

قلمى ايرمى ايل قالان رفده

منم او سازى صينيان -

شعري صيزلايان شاعر

قاچیب باغین دان،

قومسال لارا صیغینمیش قوش
 آلیب دی چئوره سینی بیر سورو سفیل قوزغون
 دامین دالانه قوروب بیر ییغین قارا بایقوش
 عدیل سیزکن هر کس اوزون بدیلی صانیب
 حبیب سیزکن هر کس اولوب رقیب سروش
 بوغوب عدو بوغازین دان قوپونجا هایقیربشین

من آچمامیش دان اشعاره دیل، اؤتردی بیرى
 بو باغ دا چه چهی گه گه اولاردی گوش نواز
 آجیق لی شعرینی صان! تازیانه «معجز»
 سحرلی نغمه سی داوود لحنی تک اعجاز
 من اؤزله یردیم اونون ساحرانه شعرینی چوخ
 گلردی،

خلوتیمه باش چکردی لاکن او آز
 او گلمه دی داها،
 کسدی آیاغینی بیزدن

دئمه ایپک اوره گین گیزلی بیر ملال صیخیر
 بو درددن داریخیر

چاخشیر

جوشور

بوزوشور

اونا صورارسان «سؤنمز»!

نه دن گيزيلديرسن؟

دئير:

داريخما! دنيزلر ده قيش دا بؤيله اوشور

دئسن كي:

شاعر!

پايلاش منيم له سر دلي

دئير:

كيشي دئهر ك سريني آياغا دوشور

او گيزلي سريني پنهان اندر ديل آلتين دا

گنجه ياتار هامى، او كؤنلونون سماسيندان

طفيل شعريني اولدوز كيمي دوغار -

آغلار

ملك گؤزون دن او الهام آلاز گولومسه يهر ك

پري دؤشون دن او اشعاريني صاغار

آغلار

گولر اوزو،

گولر،

اما ايچين ده آغلاسادا

چاخار بولود كيمي كوكرر

يانار

ياغار

آغلار

او صيزلاماز

او اگیلمز

او سؤنمز

او دینمز

کوراوغلودور بئلینه باغلی ایلدیریم قورشاق
 آلیب دیر آلتینا قیر آتی چنلی داغلار آشیر
 قلم له تخت قوروب قلب لرده شاهلار تک
 اونا شاه اسماعیلین ارثی سلطنت یاراشیر
 سهند دیر دئیه سن قار دوشوب دو ذروه سینه
 باخان دا باشینا «سلطان» یمین گوزوم قاماشیر
 گوزو سرشک ایله هئی «جام» تک دولور - بوشالیر

«سهند» سیز قالان ائل

«شهریار» سیز باغلار

گوزون تکیب سنین اشعار روح پروریوه
 قارانیغا قاپیلان قلبی قیرما!

دورما!

یارات!

صویوق

اوزون گنجه لرده صیغیندیق ال لریوه
 قولاق یاتیر یئنه باغین سکوت شیونینه
 بو کهنه نیسگیلی ثبت ائله شعر دفتریوه
 «آچیل سحر» کیمی بیرده باغیشلا باغا حیات